

名

山

藏

名山藏卷之七

臣何喬遠

典謨記

成祖文皇帝

五年三月工部尚書宋禮採木四川有大木數株出
谷浮江賜其山曰神木祠祀之四月興平王尚炳永
壽王尚烜順陽王有烜寧世子盤斌代世子遜熾來
朝上謂侍臣曰朕與卿等論政不覺語久或謂傷氣
非所以攝生豈知天下之大休戚利害非廣訪博詢
寧能知之侍臣對曰好問好察舜所以無爲也上曰

不如是不足以盡羣情五月敕左都御史陳瑛等曰
朕每歲春夏若農隙敕郡縣浚溝渠築圩岸脩陂池
捕蝗螟遇饑荒卽賑卹比河南郡縣洊罹旱澇有司
匿不聞反言稼登及遣視之有收不及四五者有十
不及一者亦有掇食草實者朕亟命賑之已悉寘于
法其榜諭天下自今水旱灾傷有司不以聞者罪如
之僉都御史俞士吉賑饑還上聖孝瑞應頌上擲還
之曰爾出賑歸未聞一語及民都御史固爾耶六月
安南平詔天下置交趾布政司羣臣譟平安南頌上
諭都察院曰朕尊我皇考舊制調發軍馬必用御寶

文書去年命內使採天花山西此朕一時過尋悔而
罷近聞內侍進詐傳詔旨偽造勘合復以天花爲名
於彼勞苦軍民所在官都不來奏爾卽遣兩御史往
治械送京師有涉者皇親不貸七月乙卯皇后徐氏
崩八月三法司奏錄囚命非犯十惡者皆貸死南人
戍極南北人戍極北流以下姑釋之交趾已平餘寇
出沒七源諸州山谷中前軍都督僉事高士文往勦
至廣源州與戰死之土文咸陽縣人洪武中以小較
從有功授燕山左護衛百戶從
靖難有功累陞前軍都督僉事爲人質直剛果
善騎射其征交趾多効勞勦死而人皆惜之九月
張輔等獻黎季犛及其子蒼之俘于京師上御奉天

門受之以付獄他子孫皆赦之給衣食于有司嘉定
縣奏請度民充僧不聽諭禮部曰民服田力穡養父
母出賦稅供上僧何補哉十月以交趾所舉明經士
人甘閏祖等十一人爲諒江等府同知賜勅及御書
慰免之羣臣有守衛卒自陳母病漬甚乞假省視上
曰曷不早白曰告守衛官不聽也上大怒曰守衛官
非人于耶黜戍邊交趾郡縣奏送所舉士上曰南不
耐寒命工部賜綿花襪靴於巾道上謂刑部尚書呂
震曰前所赦死戍囚從南北風土便宜顧南者多死
瘴癘其改發北京種田郡縣庶全活之諭韃靼可汗

鬼力赤曰前遣使致書本期通好何乃拘留不報今
再遣百戶早花等審求其故禍福之機天有顯道唯
可汗省之甲午冊諡大行皇后高平王濟燁來朝丙
申月食十一月敕張輔沐晟曰交趾反側必當勦滅
然不可濫及無辜雖兇逆之家幼子童孫驅入內地
爲民爲奴而已姚廣孝等重修文獻書成賜名永樂
大典序之曰昔聖王之治天下也盡開成之道極裁
輔之宜修禮樂而明教化闡至理而宣人文蓋自伏
義神農黃帝堯舜以至禹湯尚已之數聖人繼天立
極皆作者之君文武相承文監二代乃始有述孔子

生周之末有德無位刪修贊序功賢作者周衰百家
件繁王者迹熄秦人燔書斯道中絕漢興六藝漸傳
繼而唐宋沿習有徵我高皇帝以神聖之資廣禮樂
之途博大悠遠同聖帝明王之道朕嗣承鴻基緬思
續述以爲混一之時必有一統之制作用以序百王
之傳總歷代之典而世祀綿邈簡編顆富恒慨其難
至于考一事之微汎濫莫周求一物之實窮力莫究
譬淘金於沙探珠於海戛戛乎不易得也廼集文學
之臣纂四庫之書購募天下遺籍上自古初迄於當
世博採旁搜彙聚羣分著爲典與以氣者天地之和

也有氣斯有聲有聲斯有字故用韵以統字用字以
繫事揭綱而目畢張始振而末具舉包括宇宙之廣
大統會古今之異同巨細精粗粲然明備其餘雜家
之言亦得附見蓋網羅無遺以存考索始元年之秋
成五年之冬總二萬二千九百三十七卷名曰永樂
大典聚其散漫總其條貫於以見斯道之大彌綸天
地通貫古今支派蔓衍布著而紛紜也十二月頒高
皇帝戒飭功臣鐵榜文及勅旨於武官面申諭之通
山王孟煥來朝

六年正月勅新城侯張輔曰前以將士久勞於外今

爾等撫安平定及時班師今春氣向煖未聞還期朕夙夜在念其有妨耶速具奏聞二月命武臣子弟襲職者試騎射初試不中罰本衛所充軍三年覆試不中謫戍遠方別選才子弟代之詔曰朕念昔南征以靖內難時皇太子居守賴軍民竭忠効力供給餽餉馳驅負輓晝夜弗寧城守戰鬪冒犯矢石父母妻子朝夕不保使朕無北顧之憂朕卽位以來飲食夢寐不忘北京民其所屬郡縣數被水旱歲穀不登缺食流移朕甚愍焉永樂四年五月所逋負稅糧課程其盡蠲之諸色課程自永樂六年爲始仍免徵三年少

伸朕意焉三月詔曰比者營建北京需材於下國之
大事誠非得已民之勞止朕甚愍焉所司督責逋負
鞭笞逼迫甚失朕心河南山東西永樂五年以前悉
與蠲免東安舒城二縣饑命賑之掌交趾布政司尚
書黃福言交趾初平徵斂不一請酌定輕重賦稅之
上曰比除交趾郡縣官朕數諭之政務寬簡以綏新
附福言良合朕意戶部其輕議之

黃福字如錫昌邑人洪武中以太學

生授項城主簿改清源皆有惠政陞金吾前衛經歷
上書論國家大計太祖甚加獎異超擢工部右侍郎
永樂初遷左侍郎尋陞尚書總建北京置行部為行
部尚書交趾叛命將討之使福之南廣營辦軍門調
度有方交趾平命以尚書兼掌布按二司事交人安
之洪熙改元召還兼詹事輔皇太子其後交趾復叛

再出師討之守臣再乞請往詔三則將已失律夷民
有執福者十罰懲曰此黃公晉故父母也解衣衣之
騎乘之騎不便輿昇之至其壘尊禮甚謹福厲聲叱
之曰爾等孤負天朝厚恩天地鬼神將共絕汝徐又
曉譬以順逆禍福交事雖不可支而官軍竟無一人
被害者既還復改命董督淮泗漕運調行在戶部宣
德初調南京戶部先是朝廷初襄城伯李隆守備南
京至是復命福參贊正統初進少保五年卒年七十
八福歷事五朝易直康恕學士楊士奇南還祭掃至
南京福計病不出士奇卽往見福驚曰公輔勿主可
一日離左右士奇服遣給事中郭驥指揮金塔卜万
其言成化中諡忠宣

諭虜王本雅失里曰知爾自撒馬罕脫身別居失八
里今鬼力赤等迎爾北行以朕計之鬼力赤與也孫
台久結肺腑相倚爲固未必棄親就疎况手握重兵
雖或下有附爾者亦安敢與異志爾與鬼力赤不兩

立矣夫元運旣訖順帝以後瞬息閒六傳未聞一人
善終者此亦天意古有天下者皆封前代子孫如陳
杞徵箕漢唐亦行之我高皇帝恤元子孫尤厚爰古
思帖木兒遺還爲可汗南北共知也朕愛人之誠擬
之皇考前代有同皎日爾如幡然來歸朕當念爾無
吝封爵賞賚居爾近塞惟爾所欲若惑下人圖擁立
之虛名不顧禍機是亦惟爾特賜諭意并賜織金文
綺衣二襲綵幣二端勅新城侯張輔等曰朕命爾班
師今天氣已熱瘴癘方作善撫視之有一死瘴不名
全功四月永壽王尚烜來朝五月下詔赦交趾餘孽

勅文武官寬恤之悉停罷一切不急之務六月勅泰
寧侯陳珪及北京行部曰今方盛暑軍民赴工者飲
食作息必時有疾與醫藥斂怨爲功朕所不取命軍
民子弟僮奴有自爲僧者并其父兄送京師輸作五
臺山畢日就北京種田七月楚世子孟烷來朝論征
安南功進封張輔英國公沐晟黔國公清遠伯王友
爲侯柳升爲安遠伯瓦剌土酋馬哈木太平把禿孛
羅來朝封馬哈木爲順寧王太平爲賢義王把禿羅
爲安樂王餘論功有差八月交趾賊簡定鄧悉等復
聚衆作亂以沐晟爲征夷將軍總雲貴川蜀兵四萬

繇雲南往征之命兵部尚書劉儁贊其軍淳泥國王
麻那惹加那乃闔家來朝上嘉勞之親享之奉天門
皆賜宴九月交趾土人莫邃莫勛莫遠等來朝上嘉
初下安南時率先歸順賜勅獎賚製詩賜之復遣太
監鄭和等齎勅使古里滿刺加蘇門答刺阿魯加異
勒瓜哇暹邏占城柯枝柯撥把丹小柯蘭南巫里甘
巴諸國十月淳泥國王卒上輟朝三日厚加祭賻葬
之安德門外祠而碑之臨淮縣及靖州高要靈山二
縣皆言廟學當脩上曰此政首也工部其卽日下有
司且通行之天下勅甘肅總兵左都督何福曰得奏

欲取西平侯家所畜善馬以統孳牧昔高皇帝時勳
戚貴臣皆令畜馬蓋共享富貴意朕謹遵之其止勿
言十一月皇長孫出閣講學三法司言大辟三百餘
人覆訊皆實請處決上令行人持節諭之寃許自訴
復諭五府六部及六科曰三百餘人有一不實則死
者含寃爾等更從容審之一日未盡則二日三日便
十日何害大抵人情難得有便言駕詞者有訥不能
吐者詳悉以聽毋刑迫之十二月勅諭北京官吏耆
老軍民曰朕每惟靖難之日未嘗忘爾父子兄弟功
今宜安分力本孝親敬長教誨子孫輯睦鄉里有官

守者必廉必勤以爲善人君子或有過愆皆行改滌

夫爲善獲吉爲惡致凶天道也黔國公晟與交趾賊

簡定戰厥江敗績都督僉事呂毅兵部尚書劉儁交

趾參政劉昱皆死之

劉儁字子奇江陵人磊落不羈讀書日記數十言下筆成文平

居言不出口遇事剖決有道將人皆奇之曰吳日公

輔器也洪武中以進士擢駕部主事累進尚書張輔

征交趾儁贊其軍運籌畫策夜以繼日既捷言輔釋

其孽黨凱還上深嘉之輔還交後叛成祖命儁仍贊

沐晟軍抵化州夷人聞儁來皆喜獨賊首抗不服至

又安海口颶風大作揚沙走石晝夜莫辨儁長吁曰

天乎天乎口誦羅隱詩運去英雄不自謀且戰且行

畧無退意晟敗績儁陷賊賊執之抗聲大罵賊戲曰

揖我縱公生僞罵益烈遂遇害事聞上悼惜不已輟

朝賜賻祭甚厚皇太子諸王皆遣祭仁宗卽位數日

婦人死夫尚有旌况大臣爲國損命往者劉儁死交

未贈諡禮官卽議之遂贈榮祿大夫柱國太子少傅

諡曰懿節官其子奎給事中

興平王尚煥來朝是歲設四夷館選

國子監生教習四夷譯字曰韃靼曰女直曰西番曰西天曰回回曰百夷曰高昌曰緬甸凡八館

七年正月勅內外臣工曰文官之祿皆出民武官之功實因軍能推綏恤庶幾示報不報而又侵之國法不容鬼神禍焉諭禮部臣曰高皇帝君天下三十餘年法度明備朕恪尊成憲庶幾阜康思與民同樂其賜元宵節假十日自正月十一日爲始百官朝參不奏事有急務封疏處分軍民張燈飲酒五城兵馬弛夜禁著爲令二月上將巡狩北京命皇太子監國吏

部尚書兼詹事府詹事蹇義兵部尚書兼詹事府詹
事金忠右春坊兼大學士兼翰林院侍讀黃淮左春
坊左諭德兼翰林院侍講楊士奇爲輔遣使於巡狩
所經郡縣存問高年上曰朕巡狩北京思得老成列
置郡縣洪武中諸臣有引年未衰者吏部悉召之暫
任以政資薦靖難將士之亡沒者靈璧白溝東昌眞
定夾河藁城凡六處命英國公張輔佩征虜將軍印
充總兵官清遠侯王友充副總兵率浙福江川三廣
雲貴及楚遼寧三府護衛兵與沐晟協征交趾寇命
行在戶部尚書夏原吉兼掌行在禮兵二部都察院

事賜鈔四百貫壬午上巡北京車駕發京師翰林學士胡廣庶子楊榮諭德金幼孜扈從戊子駐蹕鳳陽謁祭皇陵上負土益陵從官皆負遂遣祭于祖陵賜鳳陽土民戶鈔遣官祭靈壁戰沒將士遂遣祭于東昌藁城夾河白溝真定壩上諸戰處祭已駐蹕徐州祀徐王墳遣祭少昊帝堯孔子顏孟嶧山諸神壬寅至濟寧晚至汶上漏下數刻上召胡廣楊榮金幼孜至行殿賜坐論事夜深辭退上曰朕每日避風沙草間且行且獵爾可隨觀早發汶上上騎射過小村茆屋數家桑棗藂茂雞豚雜處兒童婦女聚觀如不知

萬乘過上曰樂哉民家癸卯至東平州勉諸王羣臣
樂善如漢東平三月甲辰望祭泰山辛亥駐蹕景州
望祭恒山及北京山川壬子駐蹕河間府遣祭漢昭
烈帝及河間獻王戊午駐蹕涿州見諸耆老追敘供
億之勞免其租稅壬戌至北京壇而告天地於奉天
殿遣祭山川城隍之神受羣臣朝賀賜官吏軍民鈔
命文武大臣從游萬歲山交趾進白象羣臣請賀不
許敕行在刑部都察院北京行後軍都督府曰北京
官吏軍民從靖難者除十惡強盜不原餘皆釋之發
充軍者悉復其故念守城功復通政司右參議賀銀

官庚午大宴羣臣及北京耆老宴畢並賜敕勉諭四月諭行在都察院曰朕已宥從靖難者官吏軍民罪尚慮有僥倖輕憲者其以朕意示之賜皇太子書曰朕命爾監國凡事務寬大戒躁急文武羣臣皆朕所命雖有小過勿遽折辱亦不可偏聽爲奸惡機務之重審察而行稍有所忽累德不細敬之慎之閏四月敕蹇義金忠等曰皇太子監國所裁決庶務其令六科詳錄彙奏賞一人繇何罰一人繇何罰復宥繇何夫國之儲嗣天下大本爾等輔導當使天下之人仰望風采夙夜盡心庶副朕懷行在刑部都察院奏請

錄囚命重者五覆奏五月諭北京耆老曰朕惟帝王
之治教化爲先朕夙夜拳拳惟圖行之凡我百姓教
訓子孫明詩書通善道慈孝而友敬一坊一鄉之長
教訓鄉坊之人五民守業無有淫惰貧富和睦鄰保
相恤則上下相安風俗淳厚夫降祥降殃惟天善不
善惟人作惡而悛亦爲善類慎之省之營山陵於昌
平縣之黃土山車駕臨視封其山爲天壽上采輯聖
賢格言爲書四卷曰聖學心法賜皇太子而序之曰
朕惟古帝王平治天下具有要道詔訓子孫亦有成
法朕承皇考洪基仰惟締造艱難惕焉思懼明明有

訓是式是儀夙夜孳孳莫悟突與嘗欲立言訓我孫
子顧所聞者無過六經聖賢之道幾務之暇采輯爲
書名曰聖學心法揭君臣父子爲綱分而爲目有統
有專惟我子孫尚慎聽之夫人君智周天下必繇學
問治心脩身涵養以充之尊師重傳畜識以廣之先
明諸心力求其至然後可以應天下之務無不宜矣
不繇此者聖功何成治先敬天敬也者所以永保天
命也法天行體天德則上天眷顧四海乂安不然天
去人違不可延須臾饗祀鬼神尊祖配天所以報本
反始也專情其德玉帛粢盛明信薦之神其福矣祖

宗立法佑啓我後繼世之君敬之守之則世祚延長
敗而不信衰世之主也君人好惡與人同之獨好獨
惡謂之拂天人之投閒毀譽愛憎無得而辨欲求無
殆不可得已夫禍亂生於怠豫而治康本於自強一
心之用周流天下須臾斲息不可有功大要在彊勉
而已彊勉則不懈不懈則身脩家齊國治而天下平
夫亂者生於治也生於忽也非治能生亂以其久安
而忘戒是以忽亂旣亂而懼慮之無及守滿持盈居
高思危者人君所以安身而保位也道德仁義教化
之原也若夫內外者男女之位也明君爲政必先正

內則閨門和倫理正紀綱不紊矣自古國家衰亂皆繇內外易位尊卑倒置權溺于中言出于閨男教女順盛德之至也聖君爲治先親九族夫睦親人道之大也唐堯之德也詩詠行葦書言展親是以周祚遠也民國本也保如赤子未有不治也致治先育才道也者所以化民易俗也學不至道不足以成才故養才必素建學立師是其急也任人在擇才擇才之方在取信於衆論一人有好惡衆論合至公取公用當官稱事治矣藪澤之大以其能容君德之聖以其聽諫朝夕納誨賢君之盛也謙已和顏接而受之則衆

言日聞無蔽匿之情隱伏之禍好諛而喜佞拒諫而飾非大臣固榮下僚懼罪耳目壅蔽則敗亡也夫言有似是而非貌有似真而僞不可不辨也君子則處以公正表裏如一小人則用情私邪君心公正故君子有所合而偏邪無自入故夫審其邪正而慎其用舍惟明君也夫禮國紀也樂情統也教民敬莫善禮教民和莫善樂治天下者先修禮樂焉夫天地者尊卑之位也君臣者貴賤之等也義明等辨則人倫序而名分正故聖王之於天下也不使卑踰尊賤凌貴小加大庶先嫡君君臣臣父子子夫婦別長幼順

上下相維朝廷之誼明禍亂之源塞矣人君馭臣惟禮與誠遇以禮待以誠則得賢者之心賢者之心得而天下之士歸天下之士歸而百姓戴焉人君不以賞私愛以待有功不以罰私惡以待有罪賞當功則勸罰當罪則服賞吝罰弛則紀綱頽號令墮矣爵祿不足勸刑法不足嚴故賞罰者明君所恤也刑也者聖人所以使人遠罪改過也曰欽曰慎先王敬用不敢輕也殺愈多姦愈作獄愈煩天下愈亂秦隋之君也財者所以經用也善乎君子之言曰民邦本也財民心也善生財者非必取民也愛養生息使其力有

餘品節制度致用而不竭庸主則不然用掊剋之吏剝膏竭髓而謂之曰能之人也欺其君者也茅茨土堦堯所以欽明也惡衣菲食禹所以無間也賢主不侵淫於嗜欲而戒慎於奢靡故天下靖安四陲蒙福衰世之君極費而窮好天怒民怨欲國無危不可得也夷狄之性無常強則叛弱則服聖王馭之以道不威以威厚之以仁待之以信不以其歸順弛防不以其衰微忘武來則禦之服則處之起釁傲功損力耗財中國所以罷敝也夫兵也者所以備不虞也除暴救亂先用武天下既平先用文文武並用長久術也

黷則玩玩則敗聖王之治兵也教禮義焉至死而不畏危也用以征伐則萬全若夫父子人倫之至也爲人父止於慈教之也愛而不教敗其子也孝順德之大也子以事親以身之孝率天下之孝則不令從不嚴治矣善繼善述不改先志孝之實也若夫勤勵以事上廉潔以簡身謙謹以守法正心修德責難陳善毋矜毋伐毋妬毋賊毋市恩毋逞奸此臣道也歷觀人臣之敗未有不繇於懈怠貪污而恣肆者也吾所以勉爲吾之臣者也凡前諸事吾集聖賢之言爲訓脩齊治平之要蓋大畧已具於戲自昔聖帝明王賢

士君子或生或學故其言之精微可得而用不可得而離也吾揆德薄智淺寤寐戰兢無敢怠豫俯察仰思匪學匪生無足垂訓是以述而不作序厥篇端吾子孫欲觀是篇其尚先觀吾言非欲吾子孫取法吾言吾欲子孫取法於聖賢也是月安邑縣學教諭白威言安邑早傷民饑流徙吏科徵不已乞折收鈔帛當租稅皇太子從之命巡按御史罪令而以威令安邑錢塘知縣黃信中青田知縣謝子襄開化知縣夏升爲縣得民皇太子皆擢爲其本府知府六月遣御史行郡縣舉實長吏臧否陞黜之御史還奏汶上知

縣史誠祖治行第一貪污不職無甚易州同知張騰
賜誠祖勅嘉勞之并賜上尊一織金紗衣一襲鈔千
貫陞濟寧知州仍掌汶上事下騰獄勅行在吏部都
察院更悉心訪吏諭靖難諸臣曰昔漢高帝屠戮韓
彭臣主皆咎尉遲敬德爲唐功首嘗有小過一聞太
宗訓言卽自飭勵宋曹彬雖有大功恒自裁抑故能
令名終始往跡昭昭也我皇考加意勳舊飭戒諄切
謹守不違中山武寧王一人而已武寧王功大心小
出則經營四方入則杜門遠勢每旦趨朝鞠躬屏息
如藍王者斗筭小人卒至覆絕又如李景隆稔凶包

慝造爲妖讖天地鬼神暴厥逆謀朕念懿親曲存寬宥不自省究忿怨益深豈自保之道爾等從朕艱難以臻今日朕嘗申明皇考戒飭之訓茲復錄洪武鐵榜及律條定制人賜一本俾永鑒焉嗚呼朕不忘爾艱難爾亦不忘圖自保不然宥過雖有券書恐犯出宥外日至之時朕不能庇虜主本雅失里殺我所遣給事中郭驥指揮金塔卜歹且欲寇邊上怒命嚴備而將征虜焉命兵部尚書署吏部事方賓簡南京御史之才者召至北京賓奏薦御史循理等二十八人上聞有繇小吏出身者命黜之曰御史國司直須用

有學術識治體者上謂廷臣曰近日州縣數奏水旱
朕甚不寧右通政馬麟對曰堯湯不免焉抑一二州
郡耳上曰洪範雨暘皆本人事爾何不學因顧方賓
等曰朕與卿等皆當修省更須擇賢守令徙青州諸
郡民之無業者八百餘戶於薊州七月命洪國公丘
福爲征虜大將軍總兵官武城侯王聰爲左副將軍
同安侯火真爲右副將軍靖安侯王忠爲左參將安
平侯李遠爲右參將往征北虜勅諭曰本雅失里悖
逆天道拘殺信使命爾往征兵重事也自開平以往
當常若對敵至出奇兵擊之爾當從征備悉勝術審

勢察機不可執一既行復戒曰朕觀風雲氣候當必有戰占法慎則勝有言虜易取勿信之八月密雲繁峙二縣獻嘉禾行在禮部請賀不許是月麗水縣山水暴溢害民皇太子遣人撫視九月庚午朔日有食之遣使封甘肅總兵官何福爲寧遠侯諭之曰虜人來歸且勿給土田令俱來北京扈從漸漸移之南行散於便宜畜牧之處諭行在三法司曰明刑慎罰朕本心是是非非惟爾究情昔隋煬帝殺盜二千人當罪五人而已其時羣臣阿不諫朕以爲恨朕數戒爾若有冤人爾等殺之不有陽責必有陰譴丘福與

虜戰敗績死之王聰火真王忠李遠皆力戰死上聞
歎息曰福不從吾言至此此朕不明遂決親征焉賜
李遠王聰贈諡恤將士死事者家勅行在五軍厲將
士治器械天下武職坐罪者皆令詣闕自言非殊死
悉宥之簡備戎行令朝鮮國進馬助征至則酬直十
月命夏原吉沿途築城爲儲胥原吉請於宣府以北
用武剛車三萬輶運糧踵軍約十日程築城一酌儲
胥飽軍畱守戍虜覺遁卽躡其後上然之命其城曰
平胡殺胡十一月是月也督河刑部侍郎張本有疾
皇太子遣醫馳視賜鈔五百貫及狐帽狐裘

初運物
赴行在

者河海舟楫皇太子遣張本督視本早暮躬勤爲方
畧立程度舟行皆通公私便之至是疾皇太子遣醫
視十二月上諭行在戶部臣曰自濟寧至良鄉民勞
遞運數年其免戶內糧稅名張輔王友等領交趾軍
還以從征虜進封陳懋寧陽侯是月也守京城內使
言城門郎於皇太子縱酒擅離城城門郎亦言臣母
病偶歸固言之內使矣臣嘗忤內使故內使構臣皇
太子曰城門郎無疚內使上罔朝廷下誣無罪者下
錦衣衛治之令今後內官內使言事不實及挾私枉
人者寘重典

八年正月諭皇太子曰朕親征虜付爾留守事無大

小審度而行尚親賢遠佞力於學問進德而明智欽
哉是月也皇太子以淮揚鳳陽至陳州去年水患遣
近臣視免其被災田有典賣子女爲贖還工匠役京
師者悉罷遣之二月勅黔國公沐晟仍佩征夷將軍
印充總兵官雲陽伯陳旭充副總兵率師征交趾餘
寇以親征北虜詔天下命皇太孫居守北京戶部尚
書夏原吉輔之趙王高燾整理北京城池軍馬廣平
侯袁容泰寧侯陳珪輔之丁未車駕發巳酉次龍虎
臺遣祭居庸山川庚戌度居庸關次永安甸晚雨雪
已霽日下五色雲見丁巳駐蹕宣府壬戌度野狐嶺

駐蹕興和扈從臣應制譔平胡詩於馬上甲子大閱
士是月廣德州知州楊翰坐事被逮州民詣闕頌政
皇太子復其職賜鈔三百貫三月乙亥駐蹕鳴鑾丙
子駐蹕凌霄峰地燥泉乏天忽雨雪丙戌大閱乙未
駕次清水源地鹹水涸忽湧泉扈從臣應制譔神應
泉詩是月也潁川縣饑皇太子命賑之四月庚子行
營刀戟中夜皆有火光癸卯車駕至玄石坡勒銘于
立馬峰曰維日月明維天地壽立石勒銘與之悠久
壬子次擒胡山勒銘曰瀚海爲罽天山爲鏑一掃胡
塵永清沙漠賜其泉曰靈濟甲寅次廣武鎮勒銘曰

於鏐六師用殲醜虜山高水清永彰我武賜其泉曰
清流庚申次威虜鎮乏水軍士遲食賜以所乘水上
尚膳日已暮令視軍士食乃膳是月也皇太子免陝
西被災逃亡民徭役一年停徵其逋負五月丁卯次
臚胸河賜名飲馬河選勇士三百專護衛不隸於諸
將甲戌次環翠阜獲虜謀言本稚失里將西奔瓦剌
已至兀古兒札之地上令諸將悉度飲馬河分追之
乙亥留清遠侯王友廣恩伯劉才統領守營兵馬於
飲馬河上築殺胡城上率精騎循河西北行以二十
日糧往丙子發聞喜岡勅諸將避山取便道毋疲士

丁丑次平虜塞用韃靼百戶爲鄉導戊寅車駕至兀
古兒札虜已遁駐兵河上賜名清塵河倍道夜追已
卯及虜幹難河上登山先布陣逆擊破之本雅失里
以七騎遁去俘獲男女輜重孳畜仍命遊擊將軍劉
江驃騎將軍梁福等追之上駐蹕滅胡山釋俘遣之
人予口糧羊馬皆膜拜辛巳駐五原峰命都督薛祿
祭幹難河山川賜名玄冥河丙戌次飲馬河班師庚
寅至蟠龍山以所獲牛羊及光祿寺上供均給士是
月也金州靈雨泛溢皇太子遣視之賑滁宿交趾總
兵官沐晟追勦賊首陳季擴於虞江季擴遁追斬首

三千餘級六月癸巳車駕次飛雲壑倍道行甲辰偵
阿魯台聚衆山谷中命嚴陣上率數十騎登高視地
勢麾軍度山結陣行虜出沒迎且却少頃阿魯台遣
人請降上已預敕出諭之既阿魯台爲下所阻未決
再遣其甥來上賜甥酒復使與偕其下欲降者半欲
戰者半上命諸將嚴而待虜遲回不發上以數百騎
挑之虜迎戰右哨與敵阿魯台率數千騎當中堅上
率精騎衝破之阿魯台墮馬策而遁追奔十餘里虜
死且生皆亂散遂營于靜虜鎮丙午上率精騎窮追
命都督冀中金玉等領馬步卒殿至長秀川虜棄輜

重牛馬雜畜彌望中等收雜畜焚其輜重丁未上追
及虜四曲津斬其名王以下百數十人戊申追至廣
漠城上逐虜山谷間復大敗之己酉發廣漠上命諸
軍渡河而伏以輜重先上按精兵最後虜競趨輜重
伏出虜亟走上兵至虜莫知所向反奔河皆陷淖生
擒數十人餘盡死虜遂絕庚戌次寧武鎮餘虜多來
降辛亥次紫雲谷諸將皆會賀捷壬子次玉潤山上
見病卒憫之命中官周視病者悉給醫藥乙卯次清
華原令昇病辛酉次長樂鎮令都督劉江殿英國公
勛之就道瘞遣骸癸亥次金沙苑命恤士病餒收病

卒一人賞鈔五七月丁卯次開平宴勞將士分所獲
給軍上曰朕在塞外久素食非乏肉也念士不能甘
侍臣曰比見陛下服御供具貶於將帥上曰朕往時
在軍皆然此行尤念士改開平李陵驛爲威虜驛壬
申次盤谷鎮勅寧夏備禦都指揮王倬曰朕聞能特
命鎮守之癸酉次獨石止羣臣遠迎駕甲戌次龍門
皇太子使使進袍服請上更上曰將士衣久弊人關
賜之朕乃更壬午至北京癸未宴羣臣從征居守皆
預甲午大賞功是月也皇太子令州縣戶不及五里
州一年縣二年各貢生員一人禁棄男子不育者平

陽縣風潮漂沒登州府所屬諸縣疫安慶徽州鎮江
鳳陽諸郡縣饑皇太子皆命安撫賑恤之八月封安
遠伯柳升爲安遠侯賜扈從北征文職官鈔幣特命
翰林學士胡廣侍講楊榮金幼孜同尚書之賜賑輩
昌諸府饑九月幸天壽山十月上將南還丁酉發北
京以務本訓賜皇太孫其書言田野農桑之勤勞舉
高皇帝創業艱難次及往古人君聖賢昏亂可鑒戒
者以致飭勵之意是月也皇太子賑江西饑十一月
車駕至京師十二月周王橐楚王楨寧王世子盤杖
永壽王尚烜來朝左都御史陳瑛劾奏隆平侯信強

占丹陽縣之練湖及江陰縣田上曰昔中山王有沙洲一區水利所經其家僅據以厲農中山王聞而歸地於官信何敢爾命三法司雜治之諭吏部尚書蹇義毋以刀筆吏爲御史著爲令交趾賊首陳季擴上表請降許之以爲交趾布政使

九年正月陳季擴外降內叛復命張輔佩征虜將軍印充總兵往會沐晟勦捕之發諸省兵二萬四千隨征二月丁未月食下詔赦交趾罪人停其徵採三月三法司奏錄因上曰論刑之際當詳君子小人君子有過如失足誤亦偶然小人有罪如饒旦恣而無厭

安定王尚炆來朝刑部奏民有盜勸善書者當黥戍
上曰盜勸善書黥比耶命去之溫州民言歲輸白礬
山嶺爲艱乞附載之海舶上問工部臣何用礬對曰
染色布上曰染色布耳而勞民於遠罷之命自今製布
毋染四月刑部都察院請遣官各省決囚上曰京獄
有冤得擊登聞鼓在外難矣其再使審覆聞名諸王
來朝長幼次至六月內官鄭和使西洋諸番錫蘭山
國王不禮將劫之和俘王以歸官軍從入海者皆引
見命禮部與宴鈔撫恤揚州府諸縣之被水災者賑
龍游縣饑開會通河成七月浚黃河故道成陝西疫

遣戶部侍郎王彰祭西嶽及關內山川上謂兵部尚書方賓曰物性遂則生蕃往時北京軍士養馬散牧郊坵是以騷牝成羣近聞置棚造枋繫維之當有蹄齧死者飼秣失宜死者病不治死者朕以此訓諭司牧皆不遵用爾兵部申飭之以湖州諸縣淫雨沒稼免今年田租張輔沐晟敗交趾賊黨阮師於月常江汝南王有勳永寧王有光來朝滿剌加國王拜里迷蘇剌率其妻子及陪臣五百餘人人朝宴勞之厚其賜遂御朝受錫蘭山國王之俘羣臣譟來遠人討不庭詩以進賑臨城縣饑八月癸卯月食諭三法司曰

明刑慎罰朕雖面訓屬吏苟且因循自今非謀反大逆當卽死者具疏情犯朕詳覽之必五覆奏命屯田軍以公事妨農者勿徵賦著爲令肅王揆來朝十月遼王植來朝勅五府六部三法司所奏重囚論皆當死爲之惕然特再三省諭爾等審覆之勅戶部謫徙北京及充軍屯種之人免杖而徙者五年勿事免徒流而徙者三年勿事充軍屯田者一年後徵其租充軍屯種者二年後徵其租封中越爲韓王佐敬爲靖江王重修高皇帝實錄增置北京行部戶曹清吏司郎中一員永平保定河間三府同知通判各一員涿

通霸薊灤安景滄八州同知判官各一員專理屯務
藩王模谷王橐慶王橐代世子遜熅晉世子美圭來
朝丁卯命皇太子嫡長子爲皇太孫冠于華蓋殿十
一月免陝西逋負清獄囚遣御史巡視靖難時挫師
處死未盡瘞者罪所在官司十二月乙未大雨雪上
名禮部尚書呂震曰寒甚昔靖難時亦當此景將士
裂膚墜指朕尚念焉故從征者其各賜之鈔以水災
免順天府等州縣稅糧勅三法司曰每盛寒暑朕必
命恤囚比聞死獄者往往蔽不奏夫殺一微物尚有
陰禍人命至重可怠肆乎自今不謹則朕不貸上諭

工部臣曰京城軍士有出征者有守衛者妻子在營
雨雪連日必有寒凍抽分處所積薪不少戶給百斤
出征者三之成都知府賈瑜饒州知州李益九載考
滿吏部言瑜益皆得民上擢瑜福建參政益山西參
政命禮部各賜鈔百貫宴勞之朕恒念得賢守自今
守九載有治績者陞賞一視益與瑜安王楹平
陽王濟煥來朝閏十二月勅五府六部臣曰朕任賢
求言拳拳生民遺問軍民利病絡繹於道於今十年
困弊未蘇未臻治効非長之者未得人歟昏懦關茸
者不達政體貪黷苛刻者不恤人窮歟司理之官不

明其情或牽貨賄顛倒抑民歟耳目之官或拘於欲得實跡因循緘默不糾不言歟今有可以革斯弊道及軍民有所未便者條析以聞助朕奉切諭右副都御史李慶曰養民先守令守令賢否在按察司按察賢否在都御史卿等不能舉職卽按察司職亦廢何論守令其察非廉明正直之士皆黜罷之諭兵部臣曰武臣子孫世襲老弱殘疾者優給之旗較有功者優給及子孫此高皇帝舊制爾等毋以四方無事恩不至焉

十年正月刑部都察院六科劾奏天下州縣朝覲官

有勛合不完者請付治上命條上完者幾何人蓋千
五百餘人僅八十人完上嘉八十人勤賜鈔使復職
餘亦有而勉之復問鴻臚寺及六科比日命朝覲官
言民瘼言者幾何對曰百五十上曰令盡今日言絀
默者罪既命六部議行曰不當亦勿問元宵節賜羣
臣宴聽臣民觀鰲山午門外三日命造作雜務勿遣
正官俾專理民賑隴州饑山西諸縣饑有司不以聞
械治之魯王肇輝來朝以奸民奸訟繇無恒產而北
京多閒田命犯者挈妻子耕種於北方二月赦武職
犯罪者以楊士奇金幼孜爲考官會試天下士命精

擇之毋過百人曰取散木百不若得良材一伊王模
楚世子孟烷來朝遼王植有罪削護衛及儀衛司給
與軍較廚役三百人備使令三月秦王尚炳薨代世
子遜熾來朝四月慶成王尚炫來朝上諭兵部臣曰
朕申戒馬政有年矣蕃息未報其飭厲太僕及諸都
司衛官管馬官歲終以孳牧來聞考勤怠焉勅三法
司曰曩者奸惡齊黃等謀危社稷皆已伏誅復艾蕪
去穢絕其滋蔓自今三月十六日以前凡奸惡遠親
已擒在官者不宥餘皆赦之賑河南山西饑五月寧
化王濟煥來朝六月增建習譯館二十楹勅戶部臣

曰朕歲遣人行郡縣欲周知其豐歉河南饑有司不以聞其速賑之凡郡縣及朝廷所遣官目擊民艱不言者追下獄永和王濟熇來朝七月以水免蘇州府諸郡稅糧選在閒韃官教民牧馬鑄永樂通寶錢八月寧世子盤斌來朝令皇太孫兼講武事命兵部選北方民間子弟年十七至二十拳勇有材藝者給廩送京師充隨從名曰幼軍勅北京提督養馬官考驗軍士養馬孳生及數者人賞鈔五錠牧養失時罪不貸勅邊將於關外險要之處崇石垣深濠塹以防虜山東河南諸縣耆民詣闕謝賑上諭戶部曰賑饑上

責也遠來謝止復來其再止之並給路費還皇親徐
赫匿逃民法司請治之上召諭曰疎遠小人尚相戒
守法爾乃狎恩昔中山王不敢分毫越度非爾祖耶
治如律以國子監學錄王讓侍皇太孫說書曰朕聞
其孝九月上聞天壽山工匠有亡疫者爲文遣祭命
僧資薦三晝夜有司歸其骨復其家二年封志烜爲
秦王十月勅都察院大理寺出輕繫輪作贖罪者病
順天府醫療之甲子甘露降方山獵于武崗山之陽
羣臣表賀應制謨詩丁卯命皇太孫演武于方山十
一月以旱免湘陰海康遂溪三縣稅糧開州民父于

三人自言願効力天壽山上曰有爲乎曰無生受國
恩願効寸報上曰爾意誠美爾能遵教務本不犯刑
辟歸而化善于鄉卽所以報見鄉老少亦諭以朕言
遣太監鄭和齎勅往賜西南海上諸夷君長所鎮撫
陳恭上言人主侍衛宜嚴戎翟異類非我腹心不當
寘左右唐玄宋徽可爲明鑒上示羣臣曰恭言甚是
顧唐玄宋徽自有敗道豈坐用夷人君撫有薄海內
外亦安得示人不廣夫金日磾忠於漢武史那社爾
効於唐宗胡元疎外漢人南人柄用蒙古韃靼然亦
不免於亡亂十二月邳州淫雨傷稼命御史傳賑之

十一年正月辛巳朔日有食之上曰朕乖治理上累
三光衆陽之宗薄食元旦爾羣臣尚勉輔朕朝賀宴
會其悉罷免上謂通政司曰朕令來朝有司言民利
病率云田穀豐稔比聞山西民乃食樹皮草根自今
悉記之境內災傷已不自言他人言者必罪徐州饑
寬其逋稅天壽山陵成名曰長陵二月設貴州等處
承宣布政司莒沂崇明德安豐城諸縣饑賑之置烏
思藏衛命北京民分養孳生馬上巡狩北京命皇太
子監國皇太孫從乙丑車駕發京師丙寅葬仁孝皇
后于長陵三月皇太子賑湖州諸縣饑四月車駕至

北京上謂行在兵部尚書呂震曰有司妄言時和歲
豐者業加罪有切民情知治理者宜旌賞之勅三法
司慎刑行在刑部奏決囚有律輕情重者請重處之
上曰民弗信其如律賑山東饑五月諸城等縣蝗命
有司捕瘞之諭曰蝗苗蠹也爾不能除則亦民蠹端
午節幸東苑觀擊毬射柳聽文武羣臣四夷朝使及
在京耆老聚觀是日也分擊毬官兩朋駙馬都尉袁
容領左寧陽侯陳懋領右自皇太孫而下諸王大臣
以次擊毬皇太孫射柳三中上大喜旣畢使屬對稱
善賜名馬錦綺紗羅及番國布諸王大臣以下擊射

中者賜夏布綵幣有差遂命儒臣賦詩賜羣臣宴及
鈔設甘肅茶馬司於陝西行都司城外定營建長陵
功賞進封武義伯王通爲成山侯驕虞見青兗羣臣
獻詩禮部請賀不許六月上召行在戶部臣曰人從
徐州來言水災民有鬻男子者人至父子相棄窮極
矣卽驛賑之所鬻爲贖還樂亭縣水傷稼免其租壬
戌月食束鹿縣野蠶繭增設順天應天二府州縣官
府通判州判官縣佐各一員理馬政七月韃靼太師
阿魯台來歸封爲和寧王申勅交趾布政司府州縣
官善綏新附之民勅鎮守大同江陰侯吳高脩諸處

烟墩高五尺堅必鐵石八月賑仁和嘉興二縣饑申
明恤刑之令九月命扈從軍士於北京城外旁近人
種麥二十畝依屯田考較毋倚閒暇而曠沃土府軍
指揮張和自南京來奏事辭歸上頗聞昶弟倚皇太
子妃兄居鄉驕橫召諭曰開平王永城侯德慶侯家
恃外戚生事皆取滅亡汝當爲鑑因賜鈔六十錠曰
若爾家守法何翅萬之上謂戶部臣曰山東蝗有司
不問朝廷知而遣捕滋蔓矣各郡縣每歲春至驚蟄
時其卽視之初發捕使絕布政按察二司失提督者
與州縣同罪十月遣副都御史李慶齋璽書於南京

命皇太子錄囚出輕罪命諸將整飭士馬十一月以
山東新進野蠶繭織帛染栢黃製衾薦太廟瓦刺馬
哈木旣封復叛謀寇邊上將親征焉命諸將巡邊練
士馬

名山藏卷之八

臣何喬遠恭輯

典謨記

成祖文皇帝

十二年正月上諭行在工部臣脩治孔子廟元官節
上觀燈午門賜羣臣及耆老宴羣臣進詩命翰林第
高下賜鈔有差并賜耆老鈔帛二月隴州饑賑之按
問長吏之不言者上退坐右順門裏衣袖垢敝納復
出侍臣有贊聖德者上嘆曰朕日十易衣未嘗無之
但念自惜福昔皇妣躬緝故衣皇考見而喜曰勤儉

如此可法子孫朕常不敢忘三月揚州水賑之張輔
使都指揮師祐尋交阻賊首陳季擴於老撾獲之上
親征瓦剌庚寅車駕發北京皇太孫從行晚次清河
諭耆老之送駕者歸督子弟務生戊戌駐蹕宣府上
從容教太孫太孫所對皆合上意上喜庚子發寧遠
鎮行間有突兔命皇太孫射之應弦而斃賜皇太孫
名馬辛丑至萬全命忻城伯趙彝建平伯高福尚書
吳中郭資都御史李慶通政司馬麟督餉日役民隨
軍苦矣朝夕慰勞無毒以刑是月也直隸河南山陝
湖廣諸縣饑疫皇太子命賑視之四月甲辰朔駐蹕

興和大閱庚戌勅大營及五軍諸將曰軍法嚴則士
一賞功明則士服今朝發一令夕不下聞此不嚴也
將士効力名不上達此不明也其立傳令及紀功官
丁卯發清水源上以山川險易及將士之勤勞示皇
太孫馬上且曰汝知吾所以爲此者乎對曰陛下豈
圖其土地利其資畜亦豈不自爲樂虜禽獸也恩之
不戴服而遽叛陛下固欲大獮薙之永驅於絕荒令
一跡不近塞爲子孫臣民世福遂下馬叩頭上嘉歎
良久戊辰駐蹕屯雲虜多降者已巳駐蹕玄石坡申
令將士愛惜戰馬兵行毋擅離隊伍辛未駐蹕清風

整命藥病者五月癸酉朔駐蹕楊林戌上教皇太孫以創業守成之道曰天下之事不可不周知人之艱難不可不涉歷乙亥駐蹕禽胡山上念潛邸時嘗禽虜不花於此遣祭其山川之神辛卯駐蹕速兒溫都兒之地有海子水清冽賜名蒙山海是月也皇太子遣人撫綏高密安丘諸城三縣之流移者六月壬寅朔駐蹕清流港前鋒都督劉江等哨見虜跡東行下令五軍將士臨陣齊奮所誅惟首虜毋奪財物毋掠婦女毋虐老稚毋殺降附違者斬甲辰駐蹕雙泉海劉江等遇虜康哈里孩與戰斬其數十人上度虜且

至嚴哨瞭已獲虜諜言虜兵經此可百餘里丙午車
駕發雙泉海次三峽上率師兼程進命皇太孫於寶
蘇同行專以鐵騎五百護衛戊申駐蹕忽蘭忽失溫
是日馬哈木太平把禿孛羅等率衆逆我師見陣整
頓兵山巔上駐高阜望寇分爲三令鐵騎挑之虜奮
來戰上麾安遠侯升發神機銃砲斃虜數百餘人親
率鐵騎擊却之武安侯鄭亨追擊虜中流矢寧陽侯
陳懋成山侯王通等攻虜右虜堅都督朱崇指揮呂
興等前薄之連發神機銃砲虜死無數鹽城侯李彬
都督譚青馬聚攻虜左虜盡死鬪聚被創都指揮滿

都力戰死上遙見率鐵騎馳擊大敗之殺其王子十
餘人斬首數千級乘勝追奔度兩高山虜勒餘衆復
戰又敗之追至土刺河生擒數十人馬哈木太平等
脫遁會日暮皇太孫遣騎兵四覘知虜已敗走上還
帳皇太孫入見語虜敗形叩首稱賀上曰虜去未遠
尚宜窮追皇太孫曰以陛下之威虜破膽矣請班師
上曰善已酉賜名忽蘭忽失溫地曰殺胡鎮庚戌班
師虜有乘高而覘者上麾兵薄之皆潰散車駕發殺
胡鎮駐蹕回流甸遣使以擊敗馬哈木等諭和寧王
阿魯台戊午駐蹕三峯山之西南和寧王遣所部來

朝命中官往勞之庚申駐蹕飲馬西岸和寧王復遣
所部來言疾不能自詣上賜之米百石驢百匹羊百
牽別賜其部屬丙申駐蹕飲馬泉和寧王遣人謝慰
諭之乙巳次墨山峪敕皇太子以班師告天地宗廟
社稷頒詔天下是月也皇太子賑常熟縣饑七月丙
子駐蹕禽胡山敕山陝遼東臨邊諸城增烽堠謹備
禦巳丑駐蹕紅橋禁蹂田禾取人畜產者庚寅駐蹕
興和命偃軍二十日豐城侯彬成山侯通領之命興
安伯徐亨等率軍扈從巳亥駐蹕沙河皇太子遣兵
部尚書兼詹事府詹事金忠進迎鑾表上怒其緩且

奏對失辭以右春坊大學士兼翰林院侍講黃淮左
春坊左諭德兼翰林院侍講楊士奇及司經局正字
金問等輔導不職並徵之是月也皇太子賑河南湖
廣浙江諸縣饑八月辛丑朔車駕至京羣臣皆賀庚
戌大賜宴張輔執送賊首陳季擴阮師至京師伏誅
尼八剌國沙的新葛遣人入貢封爲尼八剌國王賞
從征將士九月降晉王濟熿爲庶人使與世子美圭
同守恭王墳封恭王第三子平陽王濟熿爲晉王榜
葛刺國王遣使獻麒麟羣臣獻詩禮部請賀不許孟
縣獻嘉禾上聞弗提斤六城之地肥饒命指揮塔失

往治弗提衛城池令軍民居止畋獵孳牧從其便商賈欲居者聽之伊王橐薨閏九月黃淮徵至下獄既楊士奇金問亦至命法司鞠治宥士奇名問東宮事士奇叩頭言殿下孝敬誠至凡所稽遲皆臣等罪上悅而罷行在諸臣奏士奇不宜獨宥下錦衣繫之未幾特出還職遂徵司經局洗馬楊溥芮善相繼下獄崇明縣水給米鈔賑之免差役二歲十一月郢王棟薨諭行在翰林院學士胡廣侍講楊榮金幼孜曰五經四書傳註雖定羣儒異同之說尚互可發明其會通採附爲大全書周程張朱所著如太極通書西銘

正蒙諸篇亦彙聚次之爲性理書因命舉朝臣及四方文學之士開館東華門外纂修而廣等總其事光祿寺給朝夕饌甲寅月食蘇松嘉湖杭五府水有司請半徵上盡蠲焉

十三年正月敕諭天下來朝有司曰朕夙夜圖治擢任賢能苟能盡心修職俾康兆庶天下未有不太平者也夫爲官者以忠勤廉謹爲本以公正仁恕爲先忠則不欺勤則不怠廉則不貪謹則不肆公則不私正則不偏仁則不暴恕則不害毋謂民愚而心實神毋謂朝廷可欺也而上天鑒之不遵朕言罪不赦欽

哉既復榜而申戒之午門之外瓦剌順寧王馬哈木
賢義王太平安樂王把禿孛羅遣使謝罪請朝貢如
初許之壬子午門外燈山火有死者命禮部給其家
敕皇太子曰上元張燈意同民樂火及于人天戒朕
也方茲祗懼爾亦敬之停止中外進送遣監察御史
吳文等分行天下詢察吏治得失及民間疾苦以聞
郡縣官有貪刻不律者執之聞葺老病悉送京師以
春和布寬恤之令設保安州戶部言漕運漸多請發
民治倉上曰東作將興其出徒流以下定等輸作命
武職大臣出鎮諭之曰爾皆舊人寄爾腹心夫財民

心也不傷其財斯不失其心往勉之二月遣指揮斌給事中磐等十二人分往山東西大同陝西甘肅遼東督視軍士操練屯種交趾總兵官張輔沐晟還師京師立北京馬神祠定平安南功賞釋工作囚徒四千九百餘人輸作贖罪既而多亡有司請捕之上曰必其空乏遂命見役者俱還家期秋後赴工令下有不願去者七百餘人上併盡釋之四月命張輔鎮交趾上既選幼軍隨侍皇太孫至是設府軍前衛親軍指揮使置官屬焉以水賑北京諸郡五月丁酉朔日有食之端午節上御東苑觀擊毬射柳賜文武羣臣

鈔有差文臣進詩者加賜酒席壬子月食開清江浦
河道七月諭行在都察院曰藥州知州敬代州同知
損武清知縣潛皆殘吏已置法備錄所犯榜天下以
儆民牧太監鄭和等奉使西洋諸番還命武職官犯
輕罪繫獄者有疾許出醫藥著爲令賑魏瑞昌永司
射洪巴諸縣八月以北京軍民養馬者多增置行太
僕寺少卿各一員寺丞八員戊寅壽星見賑山東河
南順天等府饑九月占城貢獅子羣臣請賀上曰元
順帝時兩都桑果葉皆五色黃龍文嘉禾有一莖至
八穗者五色雲常見朕與卿等祇敬無怠而已五經

四書大全及性理大全書成上親序之十月令郡縣
凡選發種田者能用心養馬悉除其罪大城縣水免
其租甲申上獵近郊經白河念靖難時冰合濟師遣
特牲祭告法司奏冒支官糧者上怒命戮之刑科覆
奏上曰朕過矣其如律中官李達吏部員外郎陳誠
等使西域還十一月麻林諸國進麒麟天馬神馬諸
物上御奉天門受之羣臣稽首稱頌上曰此皆皇考
威德卿等輔相功繼今益勉之蘇林荅刺古里柯枝
麻林諸番使將歸命行在禮部臣豫遣官於福建俟
其至宴餞之無簡敕周肅秦晉諸王選護衛步騎五

千以明春赴真定操練勅西北邊及中原江北諸都司武衛選所屬步騎兵以明春赴真定德州二處操練候比試於京師如洪武中故事賑潮州諸縣

十四年正月賑北京河南山東饑免其逋租停官買不急之務以水免河南諸府去年租稅二月改趙王高燧封國于彰德命漢王高煦居青州四月禮部郎中周訥請封禪尚書呂震亦以請上曰聖經無文焉管子不足道也卿乃不及魏徵五月端午節上御東苑觀擊毬射柳賜文武羣臣宴自公侯以下至衛士耆民賜鈔有差賑六安英山碭蕭西安諸縣饑置交

陞郡縣凡府十二州十九縣六十一六月儋州土官
率生黎峒首來朝上謂行在禮部曰黎人遠不沾化
而貢獻頻繁自今三年一朝著爲令哈烈撒馬兒罕
失刺思俺都淮等處朝貢使臣辭還賜鈔幣命禮部
遇所過州縣宴餞之仍遣中官魯安卽中陳誠齋勅
偕行賜哈烈王沙哈魯及撒馬兒罕等頭目金繪諸
物八月癸酉壽星見行在禮部請率羣臣賀不許九
月戊申車駕還南京十月甲戌月食癸未車駕至十
一月周王橚率其子鎮平王有熿宜陽王有拂來朝
上欲遷都北京下羣臣議羣臣合疏伏惟北京聖人

龍興之地北枕居庸西峙太行東連山海南俯中原
足以控四夷制天下土厚水甘民淳俗朴誠天府之
國帝王之都高皇帝分封陛下若有待矣陛下卽位
之初陞爲北京文武羣臣合請營建已下所司採木
川廣羣庶雲集良材神呈比來聖駕巡狩萬國來同
民物阜成禎祥駢轡天意人心昭然可知然陛下重
民而紆徐竊今漕運已通儲畜充溢將作之辰天實
啓之伏惟早賜聖斷上曰善楚王楨來朝修曲阜充
國復聖公廟復命修從祀諸賢之廟壞者古里瓜哇
滿刺占城錫蘭山木骨都東溜山喃勃利不刺陸柯

丹蘇門荅刺麻林刺撒忽魯謨斯柯枝南巫里沙里
灣泥彭亨諸國及舊港宣慰使臣來朝既辭還悉賜
文綺襲衣遣中官鄭和等齎勅及錦綺紗羅絲絹等
物偕往賜諸國王仍賜柯枝國王印誥并封其國中
山爲鎮國山親製碑文賜之先是上諭皇太子令翰
林儒臣黃淮楊士奇採古名臣對君之詞彙錄以便
觀覽至是書成賜名歷代名臣奏議遂以頒賜

十五年正月遼王植瀋王模寧王權蜀王椿安王楹
晉王濟熿來朝上集神僧傳成御製序二月谷王穗
以逆謀削爲庶人命豐城侯李彬鎮交趾肅王槩慶

王撫楚世子孟煊魯王肇輝來朝命泰寧侯珪掌北
京繕工事安遠侯升成山侯通副之遂諏日興事三
月以五經四書性理大全書頒六部兩京國子監及
天下郡縣學命天下有司雜犯死罪及徒流以下悉
縱還家營資斧徒作北京自贖興平王尚炳永壽王
尚烜祥符王有燭新安王有燾永定王有光汝陽王
有煥永興王尚烈來朝漢王高煦有罪居之樂安州
車駕巡狩北京壬子發京師已巳次邾城勅軍士所
過毋壞民稼有踐傷者除其近稅五月丙戌朔車駕
至北京命行在左副都御史李慶兼督營造命行在

工部造安樂營以居病匠太醫院分療之御史錦衣
巡視亡歿者歸其骨七月賜皇太子務本之訓勅曰
朕以教太孫今錄賜汝復別以賜皇太孫使服膺之
戊寅壽星見羣臣請賀不許九月修孔子廟成上製
文刻碑焉戊辰月食既命在工所疾未痊者護送還
家有司善撫之十一月金水河太液池水冰結爲樓
閣龍鳳花卉衆賜羣臣臨觀行在禮部尚書呂震請
率百官表賀拒不受勅曰比歲以來卿等遇祥輒賀
朕之涼德夙夜不敢康命中外諸司愛卹軍民勸課
農桑作興學校平均賦役敬祀慎刑旌表孝順節義

民鰥寡孤獨必存卹之薦舉材德遺逸之士嚴固邊

徼倉庫出納無有侵欺一遵高皇帝成憲官吏貪暴

曠職者監察御史按察司具實糾治之改前禮部尚

書趙珣爲兵部尚書巡督塞北屯戍軍民一切利病

邊務不修者以實聞職方司主事命夏縣人洪武中以太學生授

路先成珣具圖以進補其缺者增其宜置太祖謂珣

能陞武庫員外郎尋陞浙江右參政時海寇出沒劫

掠以計捕之成祖嗣位使交趾卻其金寶之餽使還

陞刑部右侍郎尋轉工部未幾陞本部尚書賜宴華

蓋殿以寵之山陵壬辰督開創隆慶保安元寧諸州縣撫

安新集之民既改兵部尚書丁內艱起復專理塞外

兵政壬寅北征珣給餽餉不絕仁宗嗣位改刑部尚

書宣德庚戌以疾致仕正統元年卒遣官諡祭命有

司治喪葬珣在襁褓母抱避寇林莽中卒遇虎熟視

去聞者異之及長英偉多才善屬文喜歌咏歷事五朝多所裨益雖貴位列卿自奉如寒素是月陝西進玉兔羣臣表賀

十六年正月以玄兔圖並表頒賜皇太子諭之曰羣臣頌朕朕心媿之夫好直則德廣好諛則過增爾將來有寄不可不審理於言故示爾知交趾賊黎利反三月乙丑月食勅天下文武官員轉貪爲廉革暴爲寬勵怠爲勤去私持公安養軍民使皆受福勅成山侯通行視陝西潼關等處曰高皇帝數命公侯重臣脩理軍政今西北邊尤急勉盡厥心六月纂脩天下郡縣志書勅交趾總兵官李彬曰爲將之道在智勇

仁信忠勇則不可犯智則不可惑仁則愛人信則不欺忠則無二爾撫鎮遠夷政當體之七月交趾布政使莫勛交州知府林希望等言交僻南荒慕化有年皇上建設郡縣俾同內向今者營建北京謹以家丁瓢等五百人獻詣闕下少効子來名勞賜鈔而遣之曰備悉遠誠殊不勞爾降勅切責陝西布政按察二司曰比聞所屬郡縣歲累不登致民流莩又不以聞其咎安在速賑之翰林院侍讀兼右春坊右贊善梁潛以輔導有闕逮下獄八月尼八刺國王沙的新葛遣人入貢使中官鄧城與其使者偕行賜賚之所經

罕東靈藏必力士瓦烏思藏野藍可般十納等處頭
目皆有賜丙戌壽星見九月壬戌月食十月諭陝西
三司曰西人苦旱征役又繁朕甚憫焉自今出使外
夷一切供應非有朝命毋得擅取違者重罪之十一
月以浙江瀕海郡縣風潮衝激堤岸墊溺民居歲治
無成上親齋戒遣保定侯孟英以太牢祭東海既祭
水患弭咸歸頌于聖誠十二月武當山宮觀成賜名
太嶽太和山親製文記之上以資皇考皇妣之福下
爲民庶祈弭諭法司曰唐太宗惡官吏貪濁犯賊必
寘法吏尚清謹民免拮尅貞觀所以爲盛朕屢勅中

外諸司不許妄殺一夫擅斂一財而官吏恣肆自若
繼今論如法以陝西旱命成山侯通脩戶部官馳賑
之諭曰民之饑餓譬抔水火速往毋緩一切不急悉
停止之民間事不便者條具以聞

十七年三月爲善陰隲書成蓋上輯古之積善而慶
顯有明效者得百六十五人人爲論斷系詩于後以
勸世焉因命禮部準大誥例抽目以試士八月勅皇
太孫曰爾年旣長尚勤學問自古帝王未有不讀書
明理而能齊治平均者交趾乂安府土官知府潘僚
反勅豐城侯李彬討之九月封劉江廣寧伯丙辰卿

雲見羣臣稱賀不許勅曰帝舜之世有百工八伯之歌四時未經萬姓未誠朕正當與卿等憂勤惕厲以荅上眷十一月丁巳甘露降孝陵松栢三日十二月勅武臣曰自古國家盛衰強弱未有不係武備之張弛有宋之時太祖太宗削除暴亂將勇兵強後嗣不脩醜虜僭竊馴致分裂宗社丘墟元有天下世宗戎部整肅甲兵強盛遂以胡主華厥後嗣主荒淫軍政弛焉覆亡竟至我高皇帝受命于天于時將帥效忠士卒奮勇天下之民陰受其賜朕嗣位以來屢勅爾等整齊隊伍操練士卒犀利器械爾等惟圖貨賄苟

且蒙塞今明與爾言爾犯他罪論勳論戚猶或可恕
若如前弊罪且用殺令自今在外繫囚當死者悉送
京師會官審錄三覆奏乃決癸未卿雲見勅皇太孫
曰比聞出郊遊獵一軍害民卽懲以法朕聞甚喜善
積而久名播天下不令而行不言而信肅王模範命
工部侍郎劉仲廉許廓覆實戶口田賦於交趾仍察
舉軍民利病以聞

十八年正月上元節上觀燈午門賜羣臣宴賜御製

詩羣臣屬和以進

詩曰皇明啓祚天眷隆太祖受命
芟羣雄奠安萬姓復人紀灑掃宇

宙腥膻空三光宜精益求精輝朗五嶽不動逾穹崇冰天
凜凜極南北虞淵陽谷窮西東梯山航海日相繼王

昂萬國皆朝宗宜揚教化敷禮樂簡拔賢俊俱登庸
問耕鑿樂穉田求志誦聲溫溫開基創業比磐
石神功聖德垂無窮朕繼大統膺天命負荷弗克殲
仲仲宵衣旰食敢自逸龜勉圖治思成功茲惟民物
日書早休養作息無寧有雨陽不怠高頌育兩開和
氣何冲融生祥毓瑞日新集靈貺所錫繇蒼亨上元
在節值三五宴樂期與臣民同巨鰲負山出平地屹
立萬俛當天中香烟下連瑞霧紫燈火上照青雲紅
教坊雜還百戲隊仙仗圖繞千花叢九衢車馬隨明
月千家絃管皆春風朕觀此景心更悅豈獨民庶欣
遭逢賴茲臣鄰力匡輶各謹乃職輸其忠繇來盛德
戒盈滿毋或怠肆障天工朕承洪業冀垂拱仰止聖
哲懷軒農太平一統治文治萬方永樂年閏正月乙
屢豐作詩敢繼南薰曲願與日海歌時雍

西月食五月交陞右參政侯保率民禦賊死之左參

政馮貴亦以討賊戰死保贊皇人縣國子生為襄城

初設交陞鄆縣擇人撫治陞交州知府又陞交州右
參政時黎利剽掠即縣保築堡要害禦之賊來攻堡

與戰不勝死貴武陵人舉進士爲兵科給事中從
張輔征交趾總督兵餉克效勤勞還奏稱旨陞交趾
右參議成陞左參政撫輯流民歸附者衆有土兵二
十餘人勁勇耐鬪每擊賊輒有功中官馬騃嫉之盡
奪其土兵及黎利反獨以羸卒數百遇賊戰六月孝
死保爲政廉恕責有才畧其死也人皆惜之

順事實書成蓋上命侍臣考古孝行卓然者得二百
七人復爲論斷并系之詩以教民以陳誠爲參政命
同中官郭敬等使哈烈諸國七月辛巳月食八月丁
酉朔日有食之巳酉壽星見丙位羣臣請賀勅曰上
天垂象以親有德朕惟恐弗堪九月以北宮殿將成
明歲將朝正于新殿遂遣行在戶部尚書夏原吉齋
勅召皇太子命行在禮部明年正月朔以北京爲京

師去行在令取南京各印信給京師諸衙門南京衙門別鑄皆加南京二字諸城縣進龍馬十月右麻刺郎國王幹刺義亦敦奔率妻子羣臣來朝禮之如蘇祿國王癸亥甘露降孝陵松栢十一月北京宮殿成詔曰朕皇考高皇帝建都江左肇造邦基肆朕纘承惟懷永圖眷惟北京實爲都會惟天意之所屬亦卜筮之攸同乃倣古制徇輿情立兩京置郊社宗廟創建宮室上以紹先志下以詒子孫營建以來天下人民樂於趨事天人協贊景貺駢臻今工告成選以明年正朔御奉天殿朝百官治萬民故茲詔示威使聞

知名皇太孫于南京交趾占城諸國來貢白鳥瑞象
羣臣應制撰詩增雲南交趾貴州三清吏司于戶刑
二部雲南交趾貴州三道于都察院賑山東諸府州
縣饑十二月封郭義安陽侯薛祿陽武侯金玉惠安
伯薛斌永順伯皇太子及太孫至先是皇太子過鄒
縣見民男女老弱持筐抬草實駐問之知以爲食惻
然下馬入民舍視民男女皆衣百結竈釜傾不治歎
曰民隱如此乎予之鈔問所苦輟食賜之山東布政
使石執中來迎太子責焉執中言已奏停今年稅太
子曰民饑且死尚及稅耶勘口數速賑之近地三日

遠五日執中請人給三斗皇太子曰與之六吾言上
毋懼擅發至是上言上嘉歎久之

十九年正月甲子朔上詣太廟奉安五廟神主命皇
太子奉安吳天上帝后土皇地祇神主於天地壇皇
太孫奉安太社太稷神主於社稷壇黔國公沐晟奉
安山川諸神主於山川壇禮畢上御奉天殿受朝賀
大賜宴赦天下和寧王阿魯台遣使來貢使要劫行
旅上戒諭之自是阿魯台不朝乙卯月食既二月賑
通渭全椒吳橋三縣楚王禎慶王璘來朝四月庚子
奉天華蓋謹身三殿災勅曰朕倣古建二京三殿同

災朕心惶懼意者敬天事神禮有息歟祖法戾歟政
務乖歟小人在位賢士隱迹歟刑獄冤濫歟讒慝交
作歟剗削培紿及田里歟蠹財妄費用無度歟租稅
太重徭役不均歟軍旅未息征調無方饋餉乏歟工
作過度民力敝歟奸人附勢羣吏弄法抑有關茸不
治而致然歟朕之寡昧未究所繇爾文武羣臣宜陳
無隱朕圖悛改以回天意停止中外之不便不急者
勅曰上天垂戒監寐不遑言寐而不禮部以朕初度
請賀甚非所以畏天而徒益不德焉其止勅吏部尚
書蹇義等二十六人巡行天下安撫軍民羣臣應詔

言事皆言遷都不便主事蕭儀言尤峻切上怒命誅之曰吾與大臣密議數月豈復不便哉科道官因劾奏諸大臣上御午門樓使廷辯諸大臣啐罵科道官書生也昧大計戶部尚書夏原吉奏曰御史給事言官也且應詔陳言臣等備員不能協贊是臣等罪上悅兩宥之給事中柯暹監察御史何忠鄭維栢羅通等應詔言事請上止巡遊引龍不離淵虎不離穴爲喻上怒詰問之引易書龍虎風雲對皆謫知邊州六月賑吳西安瑞昌潛山東光五縣饑謀者云阿魯台欲寇邊勅居庸等關嚴備徵諸都司兵京師上將巡

開平興和焉七月嚴自宮禁賑寧津高邑歛新寧上
杭五縣饑阿魯台聞上將巡邊舉衆北徙遂罷諸征
兵八月辛卯朔日有食之河間縣進白兔以水免徐
州稅糧十一月命邊將置邏騎於古北口北神樹之
地作深溝高塹以自固上復將征虜命戶部尚書夏
原吉兵部尚書方賓禮部尚書呂震刑部尚書吳中
等議皆謂頻年勞師軍馬儲胥十喪八九災沴屢作
內外俱疲重以聖體少安涉冒風沙殊所未便古不
勤兵於遠莫若休養於內備禦於外方圖入奏會上
遽召賓賓言餽餉恐不贍遂召問原吉餉數對曰贍

備禦而已亡以給大軍上不憚卽命原吉料儲餉于
開平而吳中入對與賓同遂召原吉頌繫之以大理
寺丞鄒師顏嘗署部併繫之賓懼自殺上曰朕未嘗
罪賓何遽然既聞賓平生怒而戮其屍併下中於獄
賓杭州人自監生擢刑部試郎中改兵部建文中署
應天府事坐累謫廣東以尚書茹常薦調兵部郎中
上初卽位陞本部左侍郎扈從北京陞尚書聰敏強
記職務叢睦問無不答雖寡學善應對既見信用勢
焰驕騰雖職必報原吉遭繫上時時愼言之賓方提
調靈濟宮工上數使使偵工中使聞語賓以上怒故
恐罪及自縊朝房中上初猶惜其材既浸下翰林院
聞平生所爲怒日生誅矣命刳其屍僇之下翰林院
侍講李時勉獄命侍郎張本都御史王彰督有司造
車發丁壯輓送以備征虜

三十年正月己未朔日有食之免羣臣賀辛未月食
賑龍游寧鄉二縣饑二月命考黜贓污官吏邊戍之
三月令有司遇饑荒急迫賑而後奏聞阿魯台犯興
和殺守將都指揮煥上親征之議遂決命皇太子監
國戊寅車駕發北京辛巳駐蹕雞鳴山虜聞夜遁癸
未駐蹕宣府甲申饗將士四月勅皇太子凡官軍以
罪繫者悉送軍前立功命太醫院分醫生朝夕行營
有疾者與善藥己亥勅前鋒都督朱榮等勤哨瞭慎
設伏辛丑駐蹕龍門收遁虜遺馬二千餘匹癸卯萬
壽節禮部請賀上曰朕不獲祇拜宗廟兼念從征士

卒之苦何樂於心此行驅虜安邊共効忠勇所以賀也令民以軍餉役塞外者復之一年乙卯駐蹕雲州閱兵是月也皇太子賑潁州饑五月丁巳朔令將士軍行不得離隊五十丈收放馬驢亦毋得遠離營乙丑度偏嶺命將士獵道傍山下曰非好獵也以繕士怒丙寅駐蹕陽寧勅開平備禦成安侯亮曰虜至勿戰固守俟大軍城中民禁之遠出屯堡無要害者悉徙入城丁卯大閱諭諸將曰水因地而順流兵因敵而作勢水無常形兵無常勢兵猶水也戊辰觀士卒射一卒連中三賜牛羊各一鈔五錠銀碗二曰重賞

則人勸是日上製平虜三曲使將士歌之庚午召諸
公侯馳射英國公輔安遠侯升連中應城伯亨不中
罷其領兵隆平侯信辭疾不至降爲辯事官上謂諸
將勇智兼全爲將之道弓馬便捷所向無敵勇也計
算深長智也有勇無智一卒耳辛未發隰寧次西涼
亭亭故元往來巡遊所上謂侍臣曰元人創此豈計
今日書曰常厥德保厥位厥德靡常九有以亡況一
亭耶因禁伐其亭傍樹曰殷鑒也癸酉次閔安命下
營時大臣居中五軍分駐營外建左右哨左右掖以
總之步卒居內騎卒居外神機營在騎卒外外有長

圍四周二十里軍中樵牧毋得出長圍上問諸將驅虜策皆叩頭言奉陛下成算上曰智勇先也必愛士而和僚勅皇太子曰朕今去京師漸遠軍機重務令五府六部議當行之不必來奏仍勅諸臣協心輔導丙子次威虜鎮賜皇太子書曰朕付爾宗社親賢保民是爲爾孝口腹勞人非朕心也繼今蔬果無遠進毋以軍中念朕上在軍率五鼓起或親閱軍卒或計議軍務夜與侍臣論經史或與諸將論兵法至忘寢食至是諭諸將曰軍旅重事朕不敢自逸每一令出必審思之古人云將國輔也輔周國強輔隙國弱朕

若未當爾有深謀長策卽面陳焉勅領運公侯令餽
運兵民日隨大軍行夜圍營而宿後者斬六月庚寅
次長樂鎮鎮乏水晚有泉躍出足軍壬辰次清平鎮
令曰出應昌地益平曠宜結方陣進神機馬隊整肅
列之癸巳次威遠以開平報虜復攻萬全上曰虜慮
大軍搗其巢穴爲此牽制必不足慮甲午次陽和谷
虜攻萬全者遁去丙申次祥雲屯方駐蹕有紫雲如
蓋見營南因賜屯名戊戌次翠玉峯虜有降者命善
撫之庚戌次玉河泉以深入勅前鋒都督朱榮等各
領健卒三百卒二騎齎二十日糧宵行遠伺都督吳

成等踵兵千人後應乙卯次通濟河令軍中護兵器
馬驢行糧毋委棄七月次環秀岡虜有息命將士星
馳進四出邏騎已未次殺胡原榮獲虜部屬言阿魯
台已盡棄其馬駝牛羊輜重于闊濼海之側與其家
屬直北徙上曰未信毋弛備旣果然召榮成還盡收
虜所棄牛羊駝馬焚其輜重遂命旋師夜諭諸將曰
阿魯台遁矣羽翼之者兀良哈遂分步騎二萬爲五
道上親率精騎數萬西要之庚午大敗之屈裂河追
奔三十餘里抵其巢穴斬首虜數十生獲其黨伯兒
伯克等盡收其人口牛羊駝馬焚其輜重兵器辛未

上復以兵徇屈裂兒河西大獲之甲戌兀良哈老弱詣軍門待罪戊寅次捷勝原分給所獲牛羊於將士壬午次紫駝岡寧陽侯懋以騎兵五千搜餘寇屈裂河東北深谷中獲其男婦千餘及牛羊馬數萬并得所掠邊卒男女百餘人是月也皇太子免兩直隸山東河南郡縣被水田糧若馬草八月己丑次祥雲屯寧陽侯追敗殘虜山澤中壬辰次威遠川益寧陽侯精騎千與武安侯鄭亨前行收輜重亨懋夾擊虜又大敗之庚子駐蹕武平鎮皇太子遣富陽侯李茂芳禮部尚書呂震迎駕遣李慶祭開平山川以班師諭

皇太子頒詔于天下中官鄭和等使諸番國還庚戌
次雲州禁官軍踐傷田稼皇太子遣駙馬都尉沐昕
趙王高燧遣長史趙季通六部臣推侍郎郭敦進賀
平胡表至九月丁巳度居庸關次龍虎臺饗隨駕將
較北京文武大臣迎駕見壬戌昧爽上至北京羣臣
表賀下楊士奇呂震蹇義錦衣衛獄嚴鈔法不行使
者坐大辟家徙邊宴隨征將士命禮部分等有功無
過者坐前列食上食功過相等先入關者坐次列食
中食功過俱無坐下列食下食無功有過者傍立賜
鈔各有差以楊榮金幼孜扈從之勞特命坐前列食

上食各賜二品金織紵絲衣一襲鈔五千貫封朱榮
武進伯薛貴安順伯釋楊士奇復其官十月申諭有
司逃民復業者積年逋負悉蠲免命內官韋喬監察
御史宋準郎中呂謙等八十人盤點天下軍民衙門
倉糧稽考遞年出納之數十一月鄭州獻白兔十二
月賑英山縣饑閏十二月以水免鳳陽府所屬州縣
糧

二十一年正月二月蜀王椿薨釋寔義復其官三月
釋呂震復其官賑文登縣饑五月開封府雨傷稼遣
人按視蠲其租常山中護衛總旗王瑜上變告山中

護衛指揮賢等糾合羽林前衛指揮旭等將舉兵推

趙王爲主謀不利於上及皇太子上召皇太子趙王

與諸大臣皆至捕賊親鞫而誅之

瑜字廷墨直隸山陽人隸淮安衛總

旗調常山護衛仕至右軍都督府僉事雅尚文學爲

指揮用法平恕門杜私謁爲鎮守寬大不徂務以德

服人喜觀吏屬無讀忘臣烈士傳懷然歎慕遇奸臣

賊子則切齒恨之但發不軌事有枉者死之日自束

兩手如高懸者號呼救解而卒東阿知縣貝秉彝九載當陞縣民乞

畱從之加秩二級復其任

秉彝上虞人舉進士知邵陽縣有惠政以憂去再知

東阿律已廉勤政尚寬厚興學勸士課農務民縣以大治六月庚戌朔日有食之

七月虜中有來降者言阿魯台將入掠名諭諸將曰朕當待之塞外乘其勞擊之遂定部分料軍實釋李

時勉復其官命皇太子監國壬寅車駕發京師甲辰
次土木隨征將士畢集上閱之喜遂賜宴會有邊卒
陷虜中者脫歸云今聚飲馬河北聲言犯大同寧夏
勅大同寧夏守將嚴備之勅慶王橈嚴勅護衛官軍
亦如之有告軍士取民田穀飼馬者立斬以徇戊申
次宣府書諭皇太子凡飲食及諸不急之物悉勿進
八月己酉朔宴勞大營五軍諸將因大閱甲寅車駕
發宣府次沙鎮賜諸將內殿馬曰古人克敵藉馬習
調之庚申次萬全兵民有所進獻倍償之勅大營五
軍諸將曰朕勞動將士非志用武計生民也夫有精

兵十萬可橫行天下今以三十萬衆當此殘虜何患
不克丙寅命諸將布陳聚軍士操習之神機銃當鋒
馬隊居後曰陣密則固鋒疏則達命諸將分督沿邊
隘口晝夜毋怠乙亥次沙城召見晉庶人濟熺封其
子美圭爲平陽王是月也壽星見封瓊煙爲唐王皇
太子賑靖州會同縣饑蠲兩直隸山東郡縣被災田
九月戊子次西楊河抵于陰山之脊皇太子趙王及
諸大臣遣人奉表賀壽星却不受虜僞知院阿失帖
木兒古納名等率其妻子來降備言阿魯台今夏爲
瓦剌順寧王脫歡所敗其部落潰散無所屬若聞天

兵再出遠走不暇敢復南向上命授之官諭諸將曰
雖然當謹備分令巡視緣邊修築關隘防守之西洋
諸夷遣使來貢凡十六國使者千二百人勅皇太子
宴勞厚賜命恭順伯吳克忠安順伯薛貴都督吳成
等先出騎士三千偵虜十月甲寅朔前鋒寧陽侯陳
懋追虜至宿嵬山口遇韃靼王子也先土干率妻子
部屬來歸遣人馳奏勅善視之與偕來甲子駐蹕天
城將士獵東南山上臨觀之內寅復觀獵時風日暄
霽將士健捷上喜已巳寧陽侯以也先土干及其部
屬入見上大喜召之前與之語叩頭呼萬歲命悉賜

酒饌封也先土干忠勇王賜姓名曰金忠所以宴賜
甚厚遂并諭書皇太子下詔班師頒中外甲戌駐蹕
萬全皇太子遣定國公景昌表賀十一月戊寅朔車
駕次懷來辛巳入居庸關上袞衣乘玉花龍馬臣民
夷使駢闐迎駕懽呼萬歲次龍虎臺大賜宴甲申至
京師陳鹵簿上乘御輦入謁告天地宗廟社稷出御
奉天門朝羣臣時諸番貢使咸集闕下文武羣臣上
表賀上諭以無怠無荒四夷來王之意遂召忠勇王
部下皆授官壬辰月食

二十二年正月阿魯台所部復侵掠邊塞上復召公

侯大臣熟計征虜皆贊決上可之賜文武百官及京
民四夷人等元宵節鈔二月楚王禎薨三月作五軍
使忠勇王領壯士爲前鋒諭諸將曰阿魯台始以窮
蹙來歸朕撫甚厚違天負恩不一一朕再出師擣其
巢穴命如絲髮當時若從將士計豈能復生驅而逐
之冀能改也豺狼獸心終焉不變朕非黷武必拯邊
民重建南京天禧祠賜名大報恩寺薦福于高皇帝
后四月贈從靖難之戰沒者以親征命皇太子監國
乙酉發北京己未次長安嶺享諸將壬戌萬壽聖節
車駕次赤城禮部請賀上曰朕方勞于師庚午車駕

次隰寧忠勇王所部獲虜謀云阿魯台且度塔蘭納木兒河趣漠北以避上曰寇不遠速進是月也秦王志烜薨五月己卯至開平兩上遙見士卒沾濕寒有後至者命諸將卹士甲申上夢神一再告曰上帝好生旦召問楊榮金幼孜曰何祥也豈天屬意此寇部屬耶皆對曰陛下除暴安民亦好生也或者火燃崑岡玉石俱焚上帝之意惟陛下詳之上卽命草勅使諭其部落曰往者阿魯台窮極歸朕及朕所以待之者爾等所知朕何負此而比年以來寇掠我邊鄙虔劉我蒸庶誰之過與朕聞者以天人之怒再用率師

當是之時如狗將士之志爾等復有餘命朕體好生
驅之曠遠獸心不悅荼毒增甚今王師之來罪止阿
魯台一人有能順敬天道輸誠來朝朕待以恩禮仍
授官職聽擇善地毋懷疑二以遺後悔命安遠侯柳
升埜道中遺骸上親祭之諭諸將曰武有七德禁暴
除亂是其首也又謂止戈今罪人阿魯台耳脅從之
衆有歸降者宜悉意撫綏非持兵器嚮我師者縱勿
殺壬寅次長樂鎮楊榮金幼孜侍上曰漢高祖至柏
人而心動朕次長樂思同樂也丙申次清平鎮輜重
後令諸將分接之曰不繼者危道丁酉駐蹕清平鎮

宴文武大臣命內侍歌高皇帝御製詞五章上爵之
曰此先帝垂諭創業守成之難而示淫荒酣酗之戒
也朕雖軍旅君臣杯酒敢忘先訓皆稽首謝上亦製
詞五章述奉天法祖勤政恤民之意焉己亥次威遠
川宴文武大臣亦命內侍歌之羣臣皆頌上悅悉沾
醉罷是月也遼王植薨濬縣蝗蝻生知縣王士廉齋
禱八蜡以失政自責越三月有鳥數百食之殆盡皇
太子聞而嘉賜之免揚州廣平順德湖廣河南等府
縣累歲被災田六月癸丑次金沙礫寧陽侯懋得胡
馬九匹進上曰其詐益防無怠丙辰次寶屏山諭詣

將今深入虜地益謹備戊午次玉沙泉以荅蘭納木
兒河近令諸將嚴兵已未次龍武崗寧陽侯忠勇王
率師前進至荅蘭納木兒河不見虜蓋遁久矣上遣
英國公輔成山侯通分兵大索仍命寧陽侯及忠勇
王前覘之車駕進駐河上壬戌次蒼石岡張輔等分
兵索山谷週迴四百餘里無一跡癸亥次房坡寧陽
侯返見曰請假臣一月糧深入必得之上曰朕更思
甲子次翠雲屯召諸將曰今出塞已久人馬俱勞孽
虜所存亡幾茫茫廣漠若海探粟朕不窮追遂班師
分諸將東西二路以歸上東行丙寅次蒼玉澗勅誓

而殿後庚寅次清水源刻紀行於高崖是時帝不豫
戊子次雙流凜書諭皇太子詔告天下庚寅次榆木
川上大漸遺命傳位喪服禮儀一遵高皇帝遺制辛
卯上崩大學士楊榮等以六師在外秘不發喪含斂
畢載以龍輦所至御幄朝夕上食如常儀遂馳計皇
太子八月甲辰湯榮等至自行在致遺命於皇太子
皇太子慟哭幾絕強拜受進問故命皇太孫馳計開
平迎龍輦作梓宮諭告中外巳酉龍輦次鵬鶚皇太
孫至始發喪辛亥臣民迎哭居庸關壬子及郊皇太
子親王及羣臣衰服哭迎至大內奉安仁智殿加斂

納梓宮九月壬午上尊諡曰體天弘道高明廣運聖
武神功純仁至孝文皇帝廟號太宗十二月庚申葬
長陵壽六十五世宗十七年加上尊諡曰成祖啓天
弘道高明肇運聖武神功純仁至孝文皇帝

臣喬遠曰明興二百餘年於茲臣子論及成祖尚有
武未盡善之疑豈知高帝閔謨遠烈非成祖繼之則
都必不北虜必不威四夷必不賓服中外制度必不
晏然一尊於後世夫拘孿之行豈所以論上聖之主
哉成祖居以唐太宗自擬有唐家法則匪我儔蓋湯
武耶蓋湯武耶